

Här Fernand Etgen  
President vun der Deputéiertechamber  
19, um Krautmaart  
L-1728 Lëtzebuerg

Mamer, den 11. Mäerz 2021

Här President,

sou wéi d'Chambersreglement et virgesäit, bieden ech lech, dës parlamentaresch Fro un den Här Policeminister an un den Här Minister vun der öffentlecher Funktioun weiderzeleeden.


Laut Informatiounen, déi un den ADR erugedroe goufen, verléiert d'Personal vun den ënneschten (C1 an C2) an der mëttlerer Gehaltsgrupp (B1) vun der Police pro Joer zesumme wäit iwwer eng Millioun Euro an der Pai, well keen Organigramm festgeluecht ass, wou d'Poste mat spezieller Responsabilitéit definéiert sinn, respektiv, duerch aner Indemnitéiten, déi hinnen net zougestane ginn. Am Hibleck op Poste mat spezieller Responsabilitéit ass gewosst, datt déi säit der Reform vum Staatsbeamtstatut, déi den 1. Oktober 2015 a Kraaft getrueden ass, fir all Gehaltsgrupp op maximal 15 Prozent vum Effectif vun deem Gehaltsgrupp am Organigramm festgeluecht ginn ass. Laut dem Artikel 4. vum Staatsbeamtstatut ass et de Verwaltungschef, deen den Organigramme opstelle muss, fir en vum Ressortminister approuvéieren ze loossen.

An deem Kontext hätt ech folgend Froen un déi Häre Ministeren:

1. Gëtt et oder gouf et an der Police en Organigramm, an deem d'Poste mat spezieller Responsabilitéit fir all Gehaltsgruppe festgeluecht sinn?
2. Wéi vill Poste mat spezieller Responsabilitéit sinn oder ware säit dem 1. Oktober 2015 verdeelt ginn, all Kéier a Prozent vum Effectif an no Gehaltsgrupp opgeschlësselt an dëst zousätzlech opgeschlësselt fir d'Joren 2015, 2016, 2017, 2018, 2019 an 2020?
3. Stëmmt et, dass de Verwaltungschef vun der groussherzoglecher Police säit wäit méi wéi engem Joer un engem neien Organigramm schafft, ouni datt dëse bis elo fäerdeg gestallt wier?
4. Wa jo, firwat dauert et sou laang, bis dësen Organigramm opgestallt ass?
5. Stëmmt et, datt vill Leit aus de Gehaltsgruppen C2, C1 a B1 vum Policekader op hir Majoratioun vum Échelon fir Poste mat spezieller Responsabilitéit verzichte mussen, well deen Organigramm nach net vum Verwaltungschef opgestallt gouf, respektiv, nach net vum Ressortminister validéiert gouf?
6. Stëmmt et weiderhin, datt kee Member vum Gehaltsgrupp A1 vum Policekader op eng Majoratioun vum Échelon fir Poste mat spezieller Responsabilitéit verzichte muss?
7. Wéi vill Sue ginn de Membere vun de verschiddene Gehaltsgruppe verluer, wann si déi Majoratioun vum Échelon net kréien, opgeschlësselt pro Persoun aus der jeeweileger Gehaltsgrupp a pro Mount?
8. Gëtt eng Majoratioun vum Échelon och op d'Pensiounsuspréich ugerechent?
9. Wéini gedenkt de Ressortminister den neien Organigramm ze approuvéieren?

10. Kréien d'Leit aus de Gehaltsgruppen C2, C1 a B1 déi respektiv Majoratioun vum Échelon fir Poste mat spezieller Responsabilitéit réckwierkend ausbezuelst?
11. Ass et an den Ae vun der Regierung legitim, vu Beamte vum Staatsdéngscht ze verlaangen, datt si Poste mat spezieller Responsabilitéit iwuerhuelen, ouni datt si dat mat der Majoratioun vum Échelon, déi dofir virgesinn ass, honoréiert kréien?
12. Gëtt et méi Verwaltungen oder Servicer beim Staat, wou den Organigramm nach net opgestallt ass a wou Leit aus de verschiddene Gehaltsgruppen dowéinst op d'Majoratioun vum Échelon fir Poste mat spezieller Responsabilitéit verzichten müssen?
13. Wa jo, wéi eng Verwaltungen oder Service sinn dat a firwat ass do keen Organigramm opgestallt?
14. Wien kënnst fir de finanzielle Schued op, deen eventuell fir d'Leit aus de Staatsverwaltungen an/oder Staatsservicer entstanen ass, well keen Organigramm opgestallt gouf a si dofir op eng Majoratioun vum Échelon fir Poste mat spezieller Responsabilitéit hu misse verzichten?
15. Wat gedenken déi Häre Ministeren ze maachen, datt déi respektiv Organigrammen aus de Staatsverwaltungen a Staatsservicer an Zukunft méi séier opgestallt an ugepasst kënne ginn?
16. Wann ee Verwaltungschef, wéi dee vun der groussherzoglecher Police, wäit iwuer ee Joer brauch, fir den Organigramm vu senger Verwaltung opzestellen oder unzepassen, ass dat net als disziplinaresch Verfehlung unzegesinn?
17. Kéint e Verwaltungschef vun der groussherzoglecher Police dofir disziplinaresch ubelaangt ginn, wann ee bedenkt, datt dësen deen Eenzeggen ass, deen eng Disziplinarinstruktioun géint ee Member vum Policekader ausléise kann?
18. Wien kéint sou eng Disziplinarinstruktioun géint de Verwaltungschef aus der groussherzoglecher Police selwer ausléisen, an op wéi enger gesetzlecher Basis géif dat geschéien?

Mat déiwem Respekt,



Fred Keup  
Deputéierten